



UKA 2021/26

6/10-2021

Anna Wangenheim

**Uunga siunnersuut: Utoqqaat Illersuisuat pillugu Inatsisartut inatsisaannik allannguineq pillugu
Inatsisartut Inatsisaat.**

(Isumaginninnermut Sulisoqarnermullu Naalakkersuisoq)

(Siullermeerneqarnera)

Siullermik Demokraatinuit innuttaasut uummamik pilluaqqorusuppagut, nutaamik Utoqqaat oqaaseqartartuanik toqqaasoqarmat, oqaaseqartartorlu sulilluarnissaanik kissaakkumallugu. Qalarutissaanngilaq, suliassaqartorujussuussasoq inuiaqatigiitsinni utoqqaat nipaasa siuarsarnissaannut.

Uagut Demokraatinuit qalarutiginngilarput, utoqqaat utoqqalinerminni pitsaanerusunik atugaqartinneqarnissaat minnerunngitsumillu toqqisisimanissaat maani namminneq nunaminni. Isertuuterusungilarpulli, oqaaseqartartussamik pilersitsinissamut isumaqataasimannnginnatta. Tamanna arlalinnik peqquteqarpoq. Peqqutitta ilaagaat, isumaqannginnatta allaffisornerup annertusineratigut innuttagut utoqqaat atugaat pitsanngorsarneqarsinnaasut, naamerluinnaq. Allaffisornerujussuaq annikillisarniarparput assaallu kissalaartut amerillugit toqqaannartumik utoqqaat paaqqutarineqarnerannut qulakkeerumallugu, utoqqaat ataqqinartumik pineqarnissaat ulluinnarni inuunerminni, inuuniarnermikkullu pitsaanerusumik atugaqalerlutik misigernissaat anguniagassaavoq. Tunngavigisarput alla unaavoq taamaattumik pilersitsinikkut, isumaqaratta politikkikkut ajorsarnerusoq. Politikkikkut ima piviusorsiorunnaarsimatigaagut, "attuumassuteqanngitsumik" oqaaseqartartoqartariaqalersimalluta apuusisartussamik, qanoq uagut utoqqartagut ulluinnarni aaqqissuussaanitsinnilu innerik? Nammineerluta inatsisiliorsinnaanngitsugut oqaloqatigiinnerit politikkerit innuttaasullu akornanni pisariaqartut aallaavigalugit? Assersuutigalugu nalunngilarpur, Inatsisartut ombudsmandiata sakkortuumik isornartorsiormagu utoqqaat illuanni ilisimasassanik iliuusissanillu ilisimasaqannginneq, tassani sulisut utoqqaat paaqqutarineqarnissaannut, soorlu uffarnermi nanginillu taarsersuinermi, inatsisitigut suleriaatsit ilisimanngikkaat, pinngitsaaliisummit passunneqartarsimaneri aamma/imaluunnit nammineersinnaajunnaarsitsinerit takuneqartarsimammata. Utoqqartatta Peqqinnissaqarfimmit, kommuninut ilaquaasunullu qanitsumik annertuumillu suleqateqartumit pitsaasumik, toqqisisimanartumillu passunneqarnissaminnik kissaateqarnerat tusaasariaqarparput. Utoqqartagut inuiaqatigiinni ataqqinartumik inuppalaartumillu akuutinneqarnissaminnik kissaateqartut, aammalu sulisinnaanissaat pensionisiaminnik ilanngaanneqaratik iliuuseqarfigisariaqarpavut. Taamatuttaaq aappaasup isertitaanik isumalluuteqannginnissamik annertuumik kissaateqarnerat, pilersuisussaatitaaneq pissutigalugu. Aap, inatsisitigut allannguutissanik arlaqartunik suli assersuusiorsinnaagaluarbunga politikkikkut sularisinnaasatsinnik.

Oqaaseqartartussamik pilersitsinermut tusarniaanermi siullermi akissummi taamatuttaaq takuneqarsinnaavoq, utoqqaat toqqaannartumik oqaaseqartartoqarnissaanik siunnersuut isumaqatiginngikkaat. Taamatuttaaq Inuit Pisinnaatitaaffii pillugit Siunnersuisoqatigiit siunnersuummut uunga tusarniaanermut akissuteqarsimapput, Parisimi tunngavissaliat malillugit inuit pisinnaatitaaffiinik



sulisoqartariaqartoq, aammalu politikkikkut attuumassuteqanngitsumik sulisinnaaneq allatigut qulakkeerneqarsinnaasoq.

Aap, nalunngilarput oqaaseqartartut assingusut, soorlu Meeqqat Oqaaseqartartuat aamma Innarluutillit Oqaaseqartartuat ullumikkut annertuunik pisariaqartitatsinnik ilisimasaqartut politikkerinullu nalunaarsuutinik tatiginartunik tunniussiffigisarlugit. Tamanna tamakkiisumik iluarisimaarpalput. Inuiaqatigiitsinni pissutsit amerlavallaartut nipangiutiinnarnejarpallaarsimapput meeqqanut, aamma ilaqtariinnut aammalu inunnut pisinnaasakillisimasunut tunngassuteqartut. Kisiannili uanga suli isumaqarpunga upperilluinnarlugulu, politikkikkut eqiingannginnerup kingunerigai, kipisuitsumik systemikkut sumiginnaanerit, tassanilu aamma isumaqarpunga, tunngaviusumik pitsaanerpajussasoq aningasat toqqaannartumik utoqqaat paaqqutarineqarnerannut innuttaasunullu atassuteqarnermut atoraanni, taakkumi utoqqaat atugaannik pitsanngorsaasuummata aallaffeqarfimmik pilersitsinermiit, utoqqarnummi siunnersuisartussaavoq allaffissornikkullu, sagsbehandlingimik taallugu, suliassaqarnavianiingitsumit.

Suliani Naalakkersuisuusimasut Inuit Pisinnaatitaaffii pillugit Siunnersuisoqatigiinnik pilersitsinissamut inatsisissatut siunnersuusiorsimapput oqaaseqartartut tamaasa kattullugit inuit pisinnaatitaaffiinut sulinerup qaffassarnissaa siunertaralugu, aammalu qulakkeerniarlugu innuttaasut piffimmut ataatsimut saaffiginnittarnissaat, taamatullu aaqqissuussamut nukittuumut assigiimmillu sullinnejarnissaat siunertaralugu piffinnut assigiinngitsunut ingerlatinneqaqattaangnikkaluarlutik. Nalunngilarput, utoqqaat amerlasuut pisinnaasakillisimasinnaasut inunnguuseralugu innarluuteqarnermikkut, aammali sulerulussimanerup kingunerisaanik. Taamaattumillu politikkikkut kukkoriataaqqissinnaavugut, siunnersuinerup aaqqutissiuussinerullu aggulunneratigut uffa pisariinnerulersitsigutta ajunnginnerusoq innuttaasut ataatsimik ilisimasalimmut saaffiginniffissalerlugin.

Taamaattumik taama oqaaseqarluta allannguutissatut imaattumik siunnersuuteqarpugut:

Uunga siunnersuut: Inatsisartut aaliangissasut, Naalakkersuisut peqquneqassasut oqaaseqartartut ataatsimoortinnerisigut ataatsimut allaffeqartumik inuttut pisinnaatitaaffiit pillugit siunnersuisoqatigiittut ittumik pilersitsisinnaanermut pitsaaqutit akornutissallu misissoqqullugit.

Misissuineq attuumassuteqartut pisarialimmik suleqatigalugit qanimut oqaloqatigiinnikkut ingerlanneqassaaq. Pitsaaqutitut annertuutut isigaarpalput, attuumassuteqartut tamarmik inerisaanermi peqataassasut Kalaallit Nunaanni inuttut pisinnaatitaaffiit pillugit suliap pitsasumik suliarinissaanut, immikkuutaarluni sulinani. Taamaattumik utoqqaat oqaaseqartartuanut allattoqarfimmik pilersitsineq pisariaqartumik pitsasumillu ineriautuasinnaanngilaq, aasit "taamaattarpugut"-mik pilersitsiinnartussaalluni. Isumaqarpunga, taamaaliorisimasugut ukiorpassuarni "nipittartulersuilluta" ilisimatusaataasuusaartumik politikkeqarluta piviusumik sulinnginnermit – aammalu ilaqtigut – utoqqaat inuuniapiloortillugit. Naalakkersuisut utoqqaat atugaannik pitsanngorsaanissamik kissaateqarnerat taperserparput, isumaqaannarpugulli politikkikkut nutaalioraanni pitsaanerusunik aaqqissueqqittoqarsinnaasoq, annertunerusumik ilisimasanik siunnersueqatigiinnikkut, naggataatigullu innuttaasunut tamatsinnullumi pitsaanerpaamik iluaqutaasinnaasumik.

Taamatut oqaaseqarluta tunngaviatigut siunnersuut itigartsissinnaagaluarparput, piareersimavugullu oqaloqataanissatsinnut naaperiaanissatsinnullu pitsaanerpaamik, pisariinnerpaamik minnerunngitsumillu



ersarinnermik ingerlatsinissaq anguniarlugu utoqqaat pisinnaatitaaffiinik suliat ilisimaneqarnerisa annertunerulersinniarlugit, aammalu minnerunngitsumik, utoqqartatsinnut pisariinnerusumik siunnersuineq aqqutissiuussinerlu ataatsimi pisinnaanngorlugu.

Tamakku tunngavigalugit siunnersuut llaqtariinnermut- aamma Peqqissutsimut ataatsimiitaliamut suliassanngorlugu ingerlateqqipparput.